

Morning Regional Dogri News Bulletin, 19th August 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- जम्मू कश्मीर च असेंबली चुनावें दे पैहले गेड़ लेई कल मोटिफिकेशन जारी कीती जाग।
- मुल्खै च मंकी पाक्स दी स्थिति दा जायजा लैने लेई सरकार आस्सेआ इक उच्ची सतह दी बैठक लाईं गेई। राज्यें गी निगरानी बधाने दे दित्ते निर्देश।
- भैहणे-भ्राएं दे पवित्र प्रेम दा प्रतीक रक्खड पुन्नेआ दा ध्यार अज्ज मुल्ख भरै च पूरे जज्बे कन्नै मनाया जा'रदा ऐ।
- श्री अमरनाथ जी यात्रा रमानदारी आले ढंगै सिर होई सम्पन्न। 5 लक्ख शां मते श्रद्धालुएं टेकेआ मत्था।

<><><><><><>

Election 1st Phase

जम्मू कश्मीर च इस ब'रे करोआए जाने आले असेंबली चुनावें दे पैहले मरहले लेई नोटिफिकेशन कल जारी कीती जाग। पैहले गेड़ तैहत 24एं असेंबली हल्के च मतदान करोआया जाग। 17 अगस्त तगर नामांकन भरे जाई सकदे न। अगले दिन नामांकन पत्रें दी जांच कीती जाग। अपने नामांकन परताने दी खीरी तरीक 30 अगस्त 2024 तैह कीती गेई ते मतदान औंदी 18 सितम्बर गी होग। जियां के पैहले बी दस्सेआ जाई चुके दा ऐ जे हदबंदी मगरा असेंबली हल्के दी तादाद बधाइयै 90 होई गेदी ऐ ते चुनावें त्रऊं गेड़ें च करोआए जाने न। 18 सितम्बर गी 28एं असेंबली हल्के च 25 सितम्बर गी 26एं ते पैहली अक्टूबर गी 40एं असेंबली हल्के च वोट पाए जांगन। वोटें दी गिनतरी 4 अक्टूबर गी होग ते उस्सै दिन नतीजे बी सामनै आई जांगन। एह ध्यान देने जोग गल्ल ऐ जे इस बारी असेंबली चुनावें दी अपनी इक महत्ता ऐ की जे एह 10 ब'रें परैंत करोआए जा'रदे न। 2019 ब'रे च जम्मू कश्मीर राज्य गी दऊं संघ शासत प्रदेशें च तक्सीम करी दित्ता गेआ हा। सर्वोच्च अदालतै पिछले ब'रे दफा 370 दे प्रावधानें पर फैसला सुनांदे होई निर्देश दित्ता हा जे 30 सितम्बर 2024 तगर जम्मू कश्मीर च असेंबली चुनावें करोआई दित्ते जान।

<><><><><><>

Electoral Polls

जम्मू कश्मीर च आँदे असैंबली चुनाएं लेई वोटर फेहरिस्तें दा मुकदा रूप कल जारी कीता जाग। कुल मतदाता 90 लक्ख दे कोल कच्छ होई सकदे न। इक बारी चुनां हल्कें ते मतदाताएं दी गिनतरी च मता महत्व रखदी ऐ। की जे हदबंदी करी केइए चुनां हल्कें दिएं हदें च बदलाव कीता गेदा ऐ ते असैंबली सीटां बी 86 थमां बधाइयै 90 कीतियां गेदियां न। तकरीबन 21 लक्ख वोटर 20एं थमां 29एं बरे दी बरेसू मगर न।

<><><><><><><>

MIR Statehood

कांग्रेस दे वरिष्ठ नेता गुलाम अहमद मीर होरें गलाया जे जम्मू कश्मीर दा राज्य दा दर्जा ब्हाल करने दा संघर्ष लोहका नेई ऐ ते एहदे लेई बड्डे संगठनें ते बड्डिए ताकतें दे समर्थन दी बी लोड ऐ। कल अनंतनाग दे इक कार्यक्रम दरान पत्रकारें कन्नै गल्लबात करदे होई उनें गलाया जे कांग्रेस दा मन्नना ऐ जे जम्मू कश्मीर राज्य दे दर्जे गी ब्हाल कराना कोई लोहका कम्म नेई ऐ ते प्रदेश कांग्रेस कमेटी नै पैहले गै एह संकल्प पक्का कीते दा ऐ जे कांग्रेस जम्मू कश्मीर गी परतियै राज्य दा दर्जा दोआने दा हर मुम्मकन जतन करोग।

<><><><><><><>

Doda Election

चुनावी प्रक्रिया गी सुरक्षत ते बिजन कुसा परेशानी दे जकीनी बनाने गी दिक्खदे होई डोडा जिले च शांति ते बवस्था बनाई रखने दे जतनें च तेजी आंदी गई ऐ। सुरक्षाबलें गी हाई अलर्ट उप्पर रखेआ गेदा ऐ ते सेना, पुलस ते सीआरपीएफ क्षेत्र च कनून बवस्था जकीनी बनाने लेई आपसी तालमेल बनाइयै कम्म करा'रदे न। प्रशासन नै लोकें गी बी अपील कीती ऐ जे ओह कुसा बी संदिग्ध गतिविधिएं दी जानकारी सांझी करन ते क्षेत्र शांति बनाई रखने च योगदान देन। साढ़े डोडा आले संवाददाता नै जानकारी दित्ती ऐ जे डोडा दे डिप्टी कमीशनर हरविंदर सिंह होरें सुरक्षाबलें, सिविल समाज ते बक्ख-बक्ख सियासी पार्टिं कन्नै सिलसिलेवार मीटिंग लाइयां न। तां जे चुनां प्रक्रिया गी आजादाना ते निरपक्ख ढंगा सिर तोड़ चाढ़ेआ जाई सकै। जिला चुनां अधिकारी हरविंदर सिंह होरें दस्सेआ.....

<><><><><><><>

UPSC

सूचना प्रसारण मंत्री अश्विनी वैष्णव होरें नौकरशाही च पार्श्व प्रवेश यानि लेट्रल एंट्री दी कांग्रेस पार्टी आस्सेआ कीती जा'रदी नुक्ताचीनी गी पखंड दस्सेआ। हाल च गै संघ लोक सेवा आयोग यूपीएससी नै केन्द्रीय मंत्रालयें च 45एं संयुक्त सचिवें, निदेशकें ते उप-सचिवें दे 45एं औहदें गी पुर करने लेई इक विज्ञप्ति जारी कीती दी ऐ। जेहदे पर विपक्षी पार्टिएं सोआलिया नशान पुट्टेआ ऐ। अपनी इक सोशल मीडिया पोस्ट च श्री वैष्णव होरें आखेआ जे कांग्रेस पार्टी दी अगुवाई आली यूपीए सरकार नै गै लेट्रल एंट्री दी पिरत पाई ही। उनें दस्सेआ, 2005 ब'रे च कांग्रेस लीडर वीरप्पा मोइली हुंदी अध्यक्षता आले प्रशासनिक सुधार आयोग नै उत्कृष्ट विशेषज्ञं दियां सेवां लेइयै खाली पेदे औहदे भरने दी सिफारश कीती ही।

<><><><><><>

M.Pox

प्रधानमंत्री हुंदे प्रधान सचिव पी.के.मिश्रा हुंदी अध्यक्षता च कल इक बैठक लाई गई जेहदे च देश च मंकी पाक्स कन्नै निबडने दी तैआरिएं ते जन सेहत उपाएं दी स्थिति दी समीक्षा कीती गई। इस मौके मिश्रा होरें आखेआ जे प्रधानमंत्री नरेन्द्र मोदी होर मंकी पाक्स दी स्थिति दी लगातार निगरानी करा'रदे न। प्रधान सचिव नै राज्यें च इस बमारी दा तौले पता लाने दे प्रभावी उपाएं करने ते एहदी निगरानी बधाने दे निर्देश दित्ते। उनें इस कम्में आस्तै प्रयोगशालाएं दे नेटवर्क गी बधाने आस्तै आखेआ। फिलहाल देश च मंकी पाक्स दी जांच आस्तै 32 प्रयोगशाला हैन। डॉ. मिश्रा होरें आखेआ जे इस बमारी दे इलाज ते रोकथाम दे उपाएं दा बड्डे स्तर पर प्रचार कीता जाना चाईदा। उनें मंकी पाक्स दे लक्षण ते रोकथाम दे उपाएं बारे स्वास्थ्य कर्मिएं च जागरूकता बधाने पर जोर दित्ता। देश च फिलहाल मंकी पाक्स दा कोई मामला सामने नेई आया ऐ ते एहदे मते फैलने दा जोखम बी घट्ट ऐ। मंकी पाक्स दा संक्रमण आम तौर पर 2 थमां 4 हफते तोड़ी रौहदा ऐ। आम दिक्खभाल ते इलाज कन्नै मरीज स्वास्थ्य होई जंदा ऐ। लम्मे चिरें तोड़ी संक्रमित शक्स दे संपर्क च रौहने कन्नै मंकी पाक्स दा संक्रमण होंदा ऐ। विश्व स्वास्थ्य संगठन नै अफ्रीका दे केई हिस्सें च बड्डे पैमाने पर मंकी पाक्स दे संक्रमण गी दिक्खदे होई 14 अगस्त गी इसी अंतर्राष्ट्रीय स्तर दी स्वास्थ्य आपदा घोषत करी दित्ता हा। विश्व स्वास्थ्य संगठन दे मताबक 2022 थमां अजे तोड़ी 116 देशें च मंकी पाक्स करी 90 जहार शा मते लोक संक्रमण होए न ते 208 लोकें दी मौत होई गई ऐ।

<><><><><><>

Raksha Bandhan

भ्राह्-भैहण दे बश्कार खास रिश्ते दा प्रतीक रक्खड़ी दा ध्यार अज्ज जम्मू सनें पूरे देश च मनाया जा'रदा ऐ। इस खास दिन भैहणां अपने भ्राएं गी रक्खड़ी बन्नदियां न ते परमात्मा कोला उंदी खुशहाली-अच्छी सेहत दी कामना करदियां न। भ्राह् बी अपनी भैहणें गी तोहफे दिंदे न ते उंदी रक्षा करने ते हर मौके साथ देने दा वचन दिंदे न। बजारें च ध्यार दी रौनक साफ दिक्खी जाई सकदी ऐ खास करियै रक्खड़िएं ते मठाई दी हट्टिएं पर। इस बारी अपने देश च बनाई गेदिएं रक्खड़िएं दी मंग बधी ऐ। प्रधानमंत्री नरेन्द्र मोदी हुंदा वोकल फॉर लोकल नारे दा असर दिखने गी लब्भा'रदा ऐ की जे महिलां चीनी रक्खड़ियां नेई खरीदा दियां न जेहदे करी मकामी रक्खड़ी बनाने आले खासे खुश न।

<><><><><><>

President

राश्ट्रपति द्रौपदी मुर्मू होरें देशवासिएं गी रक्खड़ी दे ध्यार दी मुमारखां दित्तियां न। अपने सनेह च राश्ट्रपति होरें आखेआ जे रक्खड़ी दा ध्यार भैहण-भ्राह् दे प्यार दे डूहगेपन गी दस्सदा ऐ ते भैहण-भ्राह् च आपसी विश्वास ते अनूठा रिश्ता होर मजबूत होंदा ऐ। राश्ट्रपति होरें आखेआ जे एह ध्यार धार्मिक ते सांस्कृतिक हदें शा बधियै पूरे देश च प्यार ते हिर्ख कन्नै मनाया जंदा ऐ ते एह ध्यार महिलाएं दे हितें दी रक्षा दे साढे घेइयै गी होर मजबूत करदा ऐ।

<><><><><><>

PM-MSG

प्रधानमंत्री नरेन्द्र मोदी होर अज्ज रक्खड़ी दे ध्यार उप्पर देशवासिएं गी ममारकबाद दित्ती ऐ। अपने सनेह च प्रधानमंत्री होरें गलाया जे एह ध्यार भैहणें ते भ्राएं बश्कार गैहरे प्रेम दा प्रतीक ऐ। उनें गलाया जे एह ध्यार सब्बने दे जीवन च खुशहाली ते सुख-समृद्धि लेइयै आए।

<><><><><><>

LG-Raksha Bandhan

उपराज्यपाल मनोज सिन्हा होरें बी रक्खड़ी दे ध्यार दी सब्बनें लोकें गी ममारकबाद दित्ती ऐ। उनें गलाया जे भ्राएं ते भैहणें दे प्यार ते भरोसे दा प्रतीक एह ध्यार साढ़ी संस्कृति दी रिवायती मूल गी होर मजबूत करदा ऐ।

<><><><><><>

Amarnath Yatra

सलाना श्री अमरनाथ यात्रा अज्ज रक्खड़ पुन्नेआ आले ध्याड़े सम्पन्न होआ'रदी ऐ। इस ब'रे देश दे बक्ख-बक्ख हिस्से थमां 5 लक्ख शा मते श्रद्धालुएं बाबा बर्फानी दे हिमलिंगम रूपै दे दर्शन कीते। इस ब'रे प्रशासन नै यात्रएु दी सुविधा लेई हर लोड़चदे इंतजाम कीते दे हे। एहदे बारे होर मती जानकारी कन्नै साढ़े श्रीनगर दे संवाददाता.....

<><><><><><>

Machail Yatra

सलाना श्री मचेल माता यात्रा दी पवित्र छड़ी कल धार्मिक श्रद्धा बश्कार किश्तवाड़ पुज्जी। साढ़े जिला संवाददाता कैलाश नाथ होरें जानकारी दित्ती ऐ जे किश्तवाड़ दे डिप्टी कमीशनर राजेश कुमार शवण होरें किश्तवाड़ कस्बे च पवित्र छड़ी दा धार्मिक श्रद्धा कन्नै सुआगत कीता। एहदे मगरा कड़ी सुरक्षा बश्कार पवित्र छड़ी श्री गोली शकरं मंदरै लेई रवाना होई गई, जेहड़ी अज्ज पाड्डर पुज्जोग।

<><><><><><>